



Komunikadu Imprensa
18 Setembru 2019

Membru grupu LGBTI Munisípiu Likisá sente hetan diskriminasaun iha família no sosiedade

Iha 12 Setembru 2019, Judicial System Monitoring Programme (JSMP), kontinua habelar informasaun ba membru grupu ho karaterístiku espesífiku mak hanesan Lesbian, Gay, Bisexual, Transgender no Intersexual (LGBTI), inan-aman, ema ho defisiénsia no estudante sira iha Munisípiu Likisá. Totál partisipante hamutuk ema nain 31.

Treinamentu ne'e inklui ema ho defisiénsia no inan-aman bazeia ba rekomendasaun hosi xefe suku Loidahar nian bainhira JSMP ba halo treinamentu iha nia suku. Tuir xefe suku ne'e katak la'ós de'it membru grupu LGBTI de'it mak hetan diskriminasaun iha familia no sosiedade maibé ema ho defisiénsia mós hetan diskriminasaun. Nune'e importante mós atu inklui inan-aman sira iha treinamentu ne'e tanba sira mak dala barak halo diskriminasaun ba sira-nia oan sira ne'ebé kategoria LGBTI nomós deficiente.

Materia ba treinamentu konstitui sesaun 2, sesaun primeiru kona-ba demokrásia, knaar órgaun soberania sira-nian no prosesu atu halo lei no oinsá mak públiku bele hola parte, enkuantu sesaun segundu kona-ba asesu ba sistema justisa formál ne'ebé inklui direitu umanu, sistema justisa iha Timor-Leste, tipu krime no nia prosedimentu sira.

Treinamentu ne'e ho objetivu atu hasa'e koñesimentu grupu ho karaterístiku espesífiku LGBTI, inan-aman, ema ho defisiénsia no estudante sira kona-ba saida mak demokrásia, kna'ar órgaun soberanu sira ida-idak nian, oinsá públiku nia partisipasaun iha prosesu halo lei no asesu ba justisa formál. Alende ne'e oinsá mak bele hatutan koñesimentu ne'ebé sira hetan ba membru LGBTI no membru comunidade sira ne'ebé la marka prezensa nomós ba sosiedade iha jerál.

Estadu iha devér tuir Konstituisaun no lei atu dezenvolve polítika ne'ebé bele asegura sidadaun sira-nian direitu inklui partikularmente membru grupu LGBTI sira iha setór hothotu hanesan polítika, ekonómia, sosiál, kultura inklui mós asesu ba justisa formál. Ema hothotu iha direitu no devér ne'ebé hanesan iha lei nia okos

hanesan prevee iha Artigu 2 Konvensaun Internasionál kona-ba Direitu Sivíl no Polítika ne'ebé Estadu ratifika nomós iha Artigu 16 Konstituisaun RDTL. Nune'e, Estadu no sociedade tomak tenke trata sira hanesan sidadaun no membru sociedade sira seluk no labele diskrimina no minimiza sira-nia orientasaun seksuál, dehan Diretór Interinu JSMP, Casimiro dos Santos.

Xefe Suku Dato, Sr. Oscar da Silva, iha sesaun abertura husu ba partisipante sira hodi bele fokus ba materia hirak ne'ebé mak JSMP sei fahe tanba konsidera katak materia importante tebes liga ho esperiénsia ne'ebé mak durante ne'e membru LGBTI rasik hasoru tanba dala barak inan ho aman sira mak halo diskriminasaun hasoru sira-nia oan ne'ebé ho orientasaun seksuál ne'ebé deferente. Iha moris loroloron membru LGBTI sira hasoru diskriminasaun oin-oin husi família, comunidade, nomós ami autoridade sira ne'ebé mak tuir lolos tenke proteze sira nia direitu maibé pela kontráriu ho prinsípiu lei ne'ebé mak iha. Alende ne'e xefe suku Dato enfase liu tan kona-ba partisipasaun membru LGBTI sira-nia iha konstrusaun Estadu ida ne'e tanba dala barak sira iha kapasidade hodi bele kompete ba kualkér oportunitade liuliu oportunitade ba servisu.

Iha treinamentu ne'e, partisipante sira halo komentáriu no hato'o katak iha comunidade sira sempre simu liafuan ida mak hanesan ema ho orientasaun seksuál ne'ebé mak lahanesan ho mane ne'e hanesan hadau fali direitu feto sira-nian no sira la presiza moris hamutuk iha sociedade ida ne'e.

Partisipante sira mós foti kestaun kona-ba igualdade iha direitu atu asesu ba servisu tanba durante ne'e sira sempre simu diskriminasaun bainhira sira ba buka servisu tanba atendimentu públiku sira sempre dehan katak ami ne'e labele hetan servisu tanba laiha funsaun ba konstrusaun estadu ida ne'e, liga ba ne'e JSMP nia pozisaun oinsá sé bainhira ami hetan tratamentu sira hanesan ne'e?

Kestaun seluk relasiona justisa nian mak partisipante sira preokupa ho desizaun balun ne'ebé mak fó de'it pena multa, serake ida ne'e hanesan pena ida mós?

JSMP nia hatan ba kestaun kona-ba diskriminasaun hasoru membru grupu LGBTI iha familia no sociedade, katak hahalok sira hanesan ne'e normalmente relasiona ho prekonseitu sociedade nian kona-ba ezisténsia membru grupu sira ne'e katak orientasaun seksuál tipu sira hanesan ne'e sei konsidera “*taboo*” no la simu iha sociedade. Ne'eduni, atu sobu rahun prekonseitu sira hanesan ne'e, socializasaun liuhosi treinamentu sira hanesan agora ne'e importante atu bele muda prekonseitu sira ne'e atu bele iha rekoñesimentu kona-ba ezisténsia ita-boot sira-nian iha familia laran no sociedade iha jerál.

Enkuantu kestaun relasiona ho igualdade direitu atu asesu ba servisu, JSMP esplika katak Estadu iha devér atu proteje no promove direitu sira hotu sidadaun sira-nian, inklui direitu atu asesu ba servisu la ho diskriminasaun bazeia ba rasa, kór, orientasaun seksuál, nsst. hanesan prevee iha Artigu 2 alinea 1 Konvensaun Internasionál Direitu Sivíl no Polítika (ICCPR) no Artigu 16 Konstituisaun RDTL. Ne’eduni, bainhira ita-boot sira hetan diskriminasaun ba ita-boot sira-nia direitu sira hosi instituisaun públiku sira Estadu nian, bele hato’o keixa ba Provedoria Direitu Umanu no Justisa (PDHJ) no bele mós ba Defensoria Públika, tanba ne’e konsidera violasaun ba direitu umanu. Nune’e, JSMP nia posizaun klaru katak violasaun direitu umanu ne’e viola prinsipiu sira ne’ebé prevee iha ICCPR no K-RDTL ka kontráriu ho prinsipiu sira Estadu-direitu demokrátiku.

Iha parte kestaun ida kona-ba tipu pena, JSMP hakarak atu dehan katak premeiru iha ita-nia nasaun Timor-Leste iha pena oin rua, mak henesan “pena prinsipál no pena asesoria”. Husi pena prinsipál ne’e iha oin haat tan mak hanesan pena prizaun, pena multa, pena servisu afavór ba comunidade no pena admoestasaun. Enkuantu iha parte prosesu aplikasaun ba pena prizaun ne’e iha dalan tolu mak hanesan ezekusaun ba pena, suspensaun ba pena no pena alternativa.

Treinamentu ne’e hetan apoiu hosi Governu Austrália liuhosi Embaixada Austrália iha Timor-Leste hamutuk ho ajénsia internasionál Governance for Development (GfD) Austrália.

Atu hetan informasaun liutan favor kontaktu direitamente:

Casimiro dos Santos
Diretór Interinu JSMP
HP: 77257466
E-mail: santos.cas76@gmail.com & casimiro@jsmp.tl
Website : <http://www.jsmp.tl/>